

安南縣志稿

送

貴州省圖書館

△
360.

4042



13603 4

安南縣志稿

貴州省圖書館复制

安南縣志稿複製說明

安南縣志稿，民國十一年安南縣知事李蘭生修，李大澤纂，未刊，現據貴州省博物館藏鈔本及本館所藏呈報本整理為六卷複製。

複製時，據有關志書對原書進行了校正，凡經校改之處，均與原文對照列校勘記於書末，以資參考。歡迎讀者對複製本提出意見。

承貴州省博物館借給藏本，謹此致謝。

貴州省圖書館
一九六六年五月

安南縣志稿序

安南有志自前清雍正邑令曾紀常何天衢囑教諭劉鎧
邑貢生郭士信纂安南舊志始初創未備後百八十餘年
邑宰周君叙彝以舊志刪修潤色欲草新志惜事未歲余
蒞茲土適李君大澤應通志局之聘所輯訪稿初成余寓
目者數嘆曰為志難矣今天下省縣孰不為志安南山川
雄偉人文蔚起遊歌之士尚多吟咏事茲土者為志記之
不得辭其責焉乃與李君略事編纂以備史家之擇自知
不逮踈繆之失焉能免之尚希後之君子刪正而潤飾則

安南之幸也民國十一年孟春安南縣知事貴陽李蘭生
序

安南縣志稿目錄

卷首

序

輿圖

卷一

建置志

沿革

城池

官署

關隘

橋梁

金石

卷二

學校志

學宮

學制學額

書院

義學

學堂

卷三

兵事志

卷四

職官志

知縣

知事

名宦

土司附

卷五

人物志

忠孝

文學

列女

卷六

經業志

農桑

林業

工業

礦業

商業

安

南


縣

圖



例圖

- 縣界
- 河流
- 山
- 縣城
- 村
- 關
- 大路



安南縣志稿卷一

建置志 沿革 城池 官署 關隘 橋梁 金石

沿革

唐以前為夜郎郡地

唐置來南縣隸琰州

宋及五代沿舊

元置安那州

明洪武十五年正月置尾灑衛尋廢二十三年十二月置安南衛隸貴州都司先治江西坡尋徙今縣城

附文

明洪武設安南衛本末

洪武十五年正月既設普安衛是月又設尾灑衛即今

安南縣地

明史云安南衛洪武十五年正月置尾灑衛於此尋廢

苗語曰尾灑猶

華言水下也取衛南尾灑山之名以名衛尋廢

明一統志云尾

灑山在衛城南二里山勢高聳其巔常有雲氣往來土人因名尾灑猶華言水下也十七年置尾

灑驛領馬乃阿計安逸三營地及必黑南俄大定上達

下達五寨地隸普安軍民府

明一統志云十七年置尾灑驛隸普安軍民府安南

舊志云尾灑驛領馬乃阿計安逸三營必黑南俄大定上達下達五寨

二十年置尾灑遞

運所二十一年置尾灑站尾灑堡

方輿紀要云二十年置尾灑遞運所二十

一年置尾灑站尾灑堡

二十三年置安南衛治江西坡設指揮使

及僉事同知鎮撫經歷等官領前後中左右五所置

千戶百戶隸貴州都司

明史云安南衛二十三年十二月置屬貴州都司南有尾灑山

東有盤江山清源洞北盤江東南有者卜河自普安州流入注盤江西有江西坡初置柵屯守於此南有烏鳴

關亦洪武中置方輿紀要云二十三年置安南衛治江西坡安南舊志云二十三年置安南衛設指揮使隸貴

州都司領前後中左右五所所置千百戶二十五年遷衛於尾灑堡築衛城

即今之安南縣城是也

明史云安南衛尋徙於尾灑築城為衛方輿紀要云二十五年

遷治於尾灑堡通志云安南縣城原為安南衛城

萬曆四年移永甯州知州駐

安南衛城方輿紀要云萬曆四年改建永甯州於安南衛按萬曆四年移永甯州駐安南衛故安南

舊志云天啟中薛三桂為永甯州知州駐安南通志云崇禎中曾異撰為永甯州知州移轄安南流寇圍安南城陷終明之世因之至清而永甯州知州始不駐安南死難

衛順治十六年改安南衛之五所地編為六里曰新化
淳德安化會昌興仁興讓隸安順府是時衛之馬乃營
地及必黑等五寨地皆為普安州土司龍氏所據十八
年平馬乃苗龍吉兆亂析普安衛地設普安縣於是割
安南衛之阿計安逸二營地及興仁興讓二里地入普
安縣康熙二十六年從總督范承勳請裁安南衛設安

安南縣仍隸安順府雍正五年改隸南籠府嘉慶二年隸

興義府此安南衛之本末也

見明史明一統志天下郡國利病書方輿紀要通志

府志安南舊志永甯州志黔南識畧

清康熙二十六年裁安南衛置安南縣隸安順府雍正五

年改隸南籠府

後改興義府

民國仍沿清制為安南縣隸貴西道

城池

安南縣城即明安南衛城周九里三分高一丈七尺門四
東曰承恩南曰振遠西曰永通北曰長甯東南二門為滇

黔大道所經

洪武十七年置尾灑驛二十年置尾灑遞運所二十二
年置尾灑站及尾灑堡二十三年置安南衛治江西坡
二十五年遷安南衛治於尾灑堡因築衛城甃以石有

門四城周四里有奇

見方輿
紀要

安南縣城周圍七百九十七丈高一丈七尺寬七尺門
四城樓四康熙二十六年裁衛改縣遂為縣城通志

官署

安南縣署 在縣城內

安南縣署在縣城內舊為安南衛署清順治十八年守備程璧建康熙二十六年改衛為縣因為縣署通志

安南縣署在城內東隅堂廡高敞左右均有書室堂後為內宅由堂右行地勢極高有亭一登亭遠眺雲山如畫亭為清道光中邑令尹思敬建後圯邑令章詒燕修之顏曰跂遠繫以詩興義府志

附詩

跂遠亭詩 並序

道光邑令章詒燕江陰人

署右一亭建自尹君年久傾圮撤而新之余萬里羈官

時時登陟因以跋遠名亭並繫以詩云

我不服食求輕身蓬萊縹緲不可登又不學作宗少文卧
遊一室山水真終朝束縛簿書裏如蠶在繭難求伸安得
振衣踏千仞披豁眼目開心神署右一亭半欹側登陟乃
覺光景生羣山巔劣起夏雲萬瓦錯落緣春城炎天晴雨
態倏忽冷序雪月光清澄一般湧現此亭下作者誰氏良
足稱使君憇息或少暇惜哉欄檻推為薪黃岡竹樓故易
朽文翁石室今終湮矧茲結構本草草能勿零落隨埃塵
我來改為近好事計費不巨力頗能使煩匠石引繩墨更

遺輿隸芟荆榛編茅結頂檐四合削竹作衛籬前橫雜蒔
花木引文羽略布筵几供飛鱣意想所到忽已就一朝坐
此欣觀成不聞謝公有墩荆公爭爭墩至今猶有聲若將
此亭與墩比亭名今後應須更吁嗟一名何足較天荒地
老賢哲猶沈淪但取黔雲楚樹不遮眼慰我萬里投荒人
教諭署 在文廟左康熙四十三年知縣王珍建今廢
訓導署 在文廟左康熙四十三年知縣王珍建今廢
典史署 在縣署左乃指揮僉事林榮故宅今廢
倉廩 縣有倉儲咸同之亂焚燬一空光緒中紳民捐資

女津縣志
修建義倉本城倉在城隍廟又各鄉均建有倉

監獄 在縣署內

郵寄代辦所 在城內宣統二年九月十三日設

關隘

海馬關 在縣城東十二里

通志云海馬關在縣城東十二里兩山之凹廣止尋丈
舊有閣跨其上閣下僅容一騎往來

舊志云哈馬關在城東十二里兩山間廣尋丈舊有真
武閣跨其上

興義府志云海馬關安南志作哈馬關或云當作下馬
關以關險僅容一騎往來峻險須下馬而行故關名下
馬也今設有塘僅塘兵五駐守宜撥弁增兵

木窄關 在縣西三十里盤江

興義府志云木窄關在縣西盤江明洪武中嘗戰於此
老鴉關 在縣城南里許

通志云老鴉關在城南里許入滇舊路兩巖之間最為
扼要

附詩

老鴉關

明正德楊慎
成都人

老鴉關仰樹間靈卜西去何當還

見楊升菴集

老鴉關

明嘉靖鄧周文化
貴陽州知州人

列戟風高仰萬山雲空葉積馬蹄艱一為行省衣冠地便是雄圖鎖鑰關使者銜恩通此道中郎飛檄定羣蠻棄繻叱馭無人說何用長纓過此間

見舊志

老鴉關

國朝楊有涵

廉纖細雨暗前山錦障泥汙只等閒日暮荒村人跡少濕雲如夢老鴉關

見蓉峰詩詞

烏鳴關 在縣城西南二十里

明史地理志云安南衛城南有烏鳴關洪武中置

明一統志云烏鳴關在衛城南二十里山巔下入深箐
洪武中置關有戍兵

通志云烏鳴關在城西二十里

興義府志云烏鳴關今土人呼為半關下通江西坡明
史明一統志謂在城南通志謂在城西今考實在城西
南明洪武中有戍兵防守今置塘僅有塘兵五名駐守

宜增兵

今塘兵
已撤

橋梁

鐵索橋 在縣城東四十里北盤江

明一統志云盤江渡在衛城東四十里路通貴州雲南
明史朱家民傳云盤江據雲貴交界兩山夾峙一水中
絕湍激迅悍舟楫多陷溺家民做瀾滄橋制冶鐵為絙
三十有六長數百丈貫兩崖之石而懸之覆以板類於
蜀之棧道

通志云明崇禎間參政朱家民創建鐵索橋毀于寇順
治十六年經略洪承疇總督趙廷臣巡撫卞三元重修

康熙六年改建木橋十九年賊又毀之二十三年總督
蔡毓榮巡撫楊雍建會題重建極為壯觀設土巡檢守
之

黔南識略云康熙二十三年重修乃益堅密橋之東歸
永甯州管理西由普安廳安南縣分管屆六年請領庫
金大修一次著為令原設驛站今移毛口矣

永甯州志云康熙二十五年被水沖壞加修如故四十
三年久雨傾圮總督巴錫巡撫高起龍重修五十年木
橋圯巡撫劉蔭樞更建鐵鎖橋面覆木板工亦浩繁舊

例三年小修五年大修自雍正六年改新路行人俱渡
毛口走盤江橋人少凡六年修一次借領藩庫養廉銀
九百五十兩普安廳安南縣同修西岸永甯州獨修東
岸

興義府志云康熙五十年巡撫劉蔭樞更建鐵索橋面
覆木板東西夾江建設橋樓二置橫江大鐵索一十九
索皆長二十八丈共二百八十五扣每扣長一尺重十
斤貫樓橫江大鐵索六皆長二十五丈共二百二十五
扣每扣長一尺重十斤欄干大鐵索八皆長十二丈共

二百四十扣每扣長五寸重半斤欄干鐵枋九十七皆長四尺每扣長寸許重一兩六錢一索共重四斤兜底橫江大鐵索用鐵枋穿練每枋長一尺五寸寬三寸厚八分重二十斤共五十五枋鐵練貫入兩岸巖石間東西建堞以護樓司啟閉凡鐵著雨必鏽此橋鐵練經久不鏽亦奇今六年修一次領藩庫養廉銀九百五十兩普安廳安南縣同修西岸永甯州修東岸

鐵索橋記

明崇禎
僉事沈翹楚
浙江人

盤江鐵索橋總憲同人朱公所構也其地一江奔流兩

山斷岸水深無底為滇黔天險之界日用小舟艤渡水
湍瀉激舟輒壞人墮溺水搏薄之而去輒為魚龍得每
日必有所傷計古今傷人不可指數安賊之亂朱公率
千兵通滇道四面賊兵數萬騎遮逼公夜渡倉卒幾溺
既濟指水而誓曰孔明有瀾江鐵索橋此渡非鐵索橋
不可吾不能為鐵橋者以吾身殉既而以公力迅掃寇
孽滇道復通謀所以構橋者費不貲或勸捐助不能十
之三公出宦來所積畢捐以供役經始於崇禎元年至
三年終事至其制之堅緻工之巧妙見之刻勒歌咏有

飛虹卧龍之句而公以示沈子沈子艱然動色曰壯哉
非常之原黎民懼焉造化有憾人力補之此孔道也藉
此安人不朽矣吾想夫春晴雨霽層峯鎖翠騷人臨眺
僕夫車馬人鄰鄰而行空橋冉冉而駕鵲至於楛矢東
來銅鞮橫鷺笳吹草青鏡歌月白所以解驂而按轡者
謂朱公之功至於是我又想夫秋高木落水深石出長
江一瀉危濤萬狀飛鳥驚而翕翼猿猱愁其攀援誰當
褰裳中流擊楫不向龍領定歸魚腹所以生死而肉骨
者謂朱公之德至於是我公之利人巨哉朱公聞之謂王

大將軍曰吾此舉非為利人也吾憶昔率兵夜渡幾不免臣子死於敵應也死於不測之淵泯泯以歿吾至今心悸所以發願解此阨語次泫然如欲下淚大將軍以告沈子曰朱公仁人也人與我一體耳以我分人則小即與人而不失其救我則大堯舜之病禹稷之己溺己饑孔孟不忍人之心皇皇汲汲直於天下自見其身而自補其心之缺陷故仁覆無外朱公切身受病發願宏深如父自炙作此功德安知為人且病定之後如病見前使人無病我心猶憾是念也豈止利涉一方所以治

亂持危宏濟天下者皆如此橋也

見碑

鐵索橋論

丁煒

盤江之橋始不過絙鐵懸渡耳近奉給水銜錢構造制始完備輪蹄往來如履康衢矣夫土簋之後繼以豆籩皮弁之餘飾以黼黻天下踵事而工豈獨一橋哉至舍鎮甯坦道而務涉盤江昔人置驛實有深意蓋必欲苗蠻之險與中國共之也正與明祖不殺奢香而令通九

驛同意孰謂一橋無關撫馭歟

見黔書

重修盤江橋記

順治經略

洪承疇

黔之安南衛卽元之普安路也千峯環繞據江為險自
下而上越頂站至盤江水深江遠溯湃奔騰前明方伯
朱公家民以鐵索架橋梁易云舟楫之利以濟不通茲
橋又濟舟楫之窮也我皇上定鼎以來十有五年見小
腆誕叙荼毒黔省蓋不知幾屢宵旰憂矣爰勤南征命
予身處行間賴

聖天子之威靈得諸王貝勒予之策力藉諸將士之果
毅始而復楚繼而克黔既而討滇旅次盤江而橋梁斷
焉但見羣山壁削孤壑淵杳杠不能成航不可渡古所

謂天塹而劃中外之域者此其一也雖然舊制鎔鐵為
絙結索為梁憑虛架閣一綫度空者寇已毀之而南遁
矣彼胆落計拙徒焚此橋以阻我也夫彼能絕道以杜
後我獨不能鳩工而圖前乎迺告諸撫君趙公庀材聯
虹率作興事計日而成之攬轡憑軾求西王母於羣玉
山而猶旦夕遇之也矧茲楚莊躋之所履及者乎矧茲
蜀漢諸葛五月渡瀘所從入之徑者乎夫洞庭彭蠡浩
浩其無際也太行孟門高高其無上也彼不修德而恃
險者亡區區之橋是斷豈足限南北哉粵古要荒南蠻

安南縣志
朝聘賓王所利而導者在此橋也今修而理之亦惟此
要荒蠻貊朝聘賓王所利而導也自茲以往風雨迭剝
金木浸微乘間必補不無借力於後賢後之原今道其
事者諒有視今之原古而明其意者也見碑

重修盤江橋記

順治趙廷臣
總督

盤江者黔之安南屬也東三十里為頂站自頂站來者
迤逶重沓攀巖裸屬愈趨愈下西三十里為安南自安
南來者其盤錯之勢尺寸千里彷彿如之兩山陡夾一
水浩瀚時明時幽聳身其地者如登極頂之上倏墜整

谷如遊歌舞之場忽夢輪劫淒神寒骨前跋後窺唏噓
而悄愴者未易名狀水從北來者高翥長騫風爭雷鳴
與石相鬥者若壯士困萬軍中提戈奮搏所向無敵一
線長空千仞飛瀑縈青繚綠又奔瀉中一奇觀也時值
春夏萬山洪流決壅而下勢如迅雷擊物一瞬不留迨
秋冬稍涸深者峻黑隙月斜明蛟龍潛穴影滅不可見
淺者沸白若剖大甕側立千尺若刻含鍰犬牙相錯與
水光相映森森然不可逼視一葦所航洶湧號怒曾不
略容行者立者張皇慘淡得之心想而口舌不能道者

纍纍也夫深不可屬淺不可揭葦不可航游不可泳是
不可以無橋考昔間用舟楫傾覆不常明崇禎初本省
方伯朱公家民初鐵索三十六上鋪木板擊曳過江采
練駕構歷四年而成費及數萬金更設稅置橋田備歲
補葺厥後流寇據滇我大清朝王師進討復燬於賊僅
存索七幸值凍涸而能用濟識者以為天授云自此滿
漢兵馬羽檄交馳戎餉絡繹皇華之使商賈之客雲蒸
雨合春夏水泛褰裳而裹足者相視以目予奉天子命
總制滇黔兩省屯兵駐驛問俗褰帷深知此水之為患

不小也時值大兵凱旋偕撫軍卞君合疏請旨皇上以
稅課檄道府廳衛各官殫心鼎建仍復鐵索之舊時在
速成僅列十索架板約費千五百餘金而搖動閃爍心
切憂之夫去危就安必使載馳載驅如履奠康今重足
而驚怖負荷而戰慄猶之未安也越一載會同撫軍卞
君再疏入告加建木梁兩月始成孔固孔碩人馬坦適
矣仰見我皇上明見萬里慮民之不安於野而薄賦輕
徭慮商賈之不安於途而徒枉輿梁故兩請而獲邀俞
旨豈偶然哉但可必者人不可必者天山川崩涸陵谷

變遷即天地且無恃以久存何況於土木在後之蒞茲
土者風雨綢繆以維持於不朽因勒諸石以為之記見碑

重修鐵索橋記

順治貴卞三元
州巡撫

盤江之源出烏撒繞曲靖西導七星關而下安南境為
入滇渡處兩山排立類巨靈之擘以界滇黔也兩巖中
絕壁立如削江水注之淵澄而湍激比險於瞿塘其濤
瀧瀕洞不可嚮通魚鱉弗宍蛟龍弗宮鯨鱷怪物弗能
遊是以方舟無功用楫無力雖忠信如梁父莫敢涉也
顧盤江之外滇實宅焉茲為黔輔車唇齒之阨若之何

聽其險而不可渡也前方伯朱公家民迺鑿鐵以為經鑿巖以為椽亘兩壁而貫之經之以板緯之以鐵蓋亦棧之類橋者名為鐵索橋道路始通云即莊躋以下曾未及此不可謂非海內之奇制也第鐵之為性也剛絀之為性也柔橫亘其中自弗能強矣行其上者足之上下輒因之升降而板則或起或伏若將顛焉人之體亦因之撼搖而不能自持如乘巨浪之艇如履將泮之冰鮮不昏眩而寒慄者凡經此必輿而釋騎而下負荷而稅亦勢之莫可如何者也且眠前者涉岸而後者始登

則相躡而愈震欲前欲却俱不可得危孰甚焉况萬騎
萬卒之遶邁乎

大清削平海內拓土豎滇而疆場未盡靖恒遣

禁旅更班彈壓歲運數百萬金錢以供芻糗月頻至焉
此外飛章羽檄及他遞郵絡繹不絕而昔之七經今為
寇燬者一則力弱而渡益危人馬患之總憲趙公統攝
二省大政嘗往來於曲靖安順間歲數過此橋乃熟習
形勢則謀於予曰盍亟圖而新之予拜手曰可於是營
諸鐵索之次鼎建輿梁焉石之不可則取諸木迺命予

督丁役采於山得巨材二百八十株使排連之卧於岸上鎮之以巨石穿之以勁榦而兩大木之不接者選材可六丈者矩之以交其上而彌縫焉植者為檻幃者為屋兀者為門無者不宜於是騰未雲之龍駕未雨之虹矣則與古之鐵索並存於險阻之間雖踵事增華神明其物不可謂非奇異軼出者也視故橋之用則可以雁序而前可以魚貫而越可以方軌聯鑣携笈荷擔千萬人列隊建旗而坦行矣且不知有川水之厲甯知有風搖電掣之驚乎於戲有水火之窮前人濟之以金今人

繼之以木五行之利溥矣哉是役也授略於總督趙公
濟其用者藩司嚴敏糧道王廷弼程其功者安順司李
沈機永甯刺史徐國維董其役者盤江遊擊王官姚有
智安南守備程璧余則贊成而已工役之值則取諸關
稅閱三月而就俾由滇黔者自今無恐公私賴之僉曰
趙公濟川之力也

見碑

鐵索橋論

康熙貴州
州巡撫田雯

唐明皇作橋於蒲阪夏陽津鑄鐵牛八植柱纜二十四
連鎖十二山架八牧人入於中流分立亭亭如虹蜺之

狀稱奇絕焉然此乃安流通津作之者易不若盤江鐵
索橋之難且奇也盤江之源出自金沙入烏撒繞曲靖
西道畢節七星關而注於安南入滇所必經也兩山夾
峙一水中絕斷岸千尺湍激迅悍類天設以界滇黔不
知莊躋當日何以飛渡也往以舟濟多墮溺明天啟間
監司朱家民擬建橋而不可以石乃仿瀾滄之制冶鐵
為絙三十有六長數百丈貫兩巖之石而懸之覆以板
類於蜀之棧而道始通其功偉矣然絙長則力弱人行
其上足左右下絙輒因之升降身亦為之撼搖眩掉不

自持車馬必下前者眇岸後者始登若相躡則愈震其險也不可名狀邇來濟之以木擇材之巨者數百排比之卧於兩岩水次鎮以巨石柱以強榦層累而加參差以出鐫其本使固及兩木之末不屬者僅三十尺有四則又選圍可丈之木交其上而後行者可方軌聯鑣貫魚逐隊而不驚也猶且施之以欄楯幬之以版屋塗之以丹雘梵宇琳宮鱗次於巖之左右輝煌掩映如小李將軍圖畫遂為西黔勝概焉以視十二之連鎖直緯索耳况於沉江之陋耶論曰予聞之黔人矣去盤江二十

里由鎮甯僻徑西行渡花河歷普安黃草壩入翁蘇亦
資孔水淺而路平赴滇差便乃何以萬里昆明舍坦途
而就艱阻也明初傅湯諸人伐山開道拓疆闢土之日
豈其狃於成見而未之聞歟抑盤江為烏蠻郎岱地不
欲其奇險足恃故深思遠計為驛使往來之衢以通王
會之車書也不然望跼跼之飛鳶以祀神於金馬碧雞
之境不已難乎

見黔
書

附詩

讀鐵橋圖記

明萬歷
王思任
山陰人

水折三江裏橋飛百濮間化民無獄訟贈客有江山制鐵

龍能避銷兵虎自閒金城方略壯常鎮九疑關

見永甯志

鐵橋告竣志喜

明崇禎布政朱家民曲靖人

牂柯形勢向雲盤山插層霄萬疊寒地險難容江立柱神

工止許鐵為欄人從塵市樓中現我在金鰲背上看三載

胼胝今底定伏波銅柱照巔岫

見通志永甯志

橋工竣次第建石城十一座告成志喜 朱家民

畫破青山路一條走鞭飛鐵去來遙礙天巖樹冬先發銷

磴溪雲畫不銷耕鑿正聞歌帝力車驂不復畏兵驕金湯

聯絡皇輿鞏盡職何功敢任勞

喜鐵橋成

明崇禎雲南布政 潘潤民 貴陽人

黑水由來破浪狂何人石上架飛梁
千尋鐵鎖橫雲漢百尺丹樓跨采鳳
可信臨流無病涉因知濟世有慈航
瀾滄勝蹟今重見遺愛謳歌滿夜郎

盤江橋

明崇禎時人 張鏡心

萬里盤江裂地來巨靈掌擘四山開
波騰斷峽虛蘭楫石咽濤聲走怒雷
湧霧迷漫千嶂合穿雲繚繞一龍迴
從今人渡金繩上共賴君饒濟世才

渡盤江鐵橋

明崇禎禮部侍郎 王錫衮 祿豐人

盤江始自武淐穴奔流萬里勢滌滌兩岸雄關插碧天
一線羊腸山截菓浪觸雲流倒瀉來遙望澎湃無時輟幾載
舟中登櫂艱風急船沂心膽裂天生英傑拯民溺獨創慈
航志已決對此江神誓此身一片精神鬼神徹飛梯何須
藉鰲背金繩直嵌山之側橫空貫索插雲蹊補天絕地真
奇絕曾聞羅浮道士作浮橋風雨薄蝕虞飄折又聞飛閣
用石鹽百年那得堅如鐵嗟哉我公為禹之功臣奚止云
商家之舟楫祇今南北去住無望洋直令萬禩懷明德

題鐵橋

明崇禎貴州學政 陳士奇 漳浦人

漳水春猶早，炎方日未齊。
虎當官路鬪，猿掛驛樓啼。
繩鎖金沙界，橋飛乳洞梯。
當年無寶筏，腸斷夜郎西。

興義府志云：士奇後官至四川巡撫，殉難。明史有傳。

曉渡鐵橋

明崇禎少保大學士 張瑞圖 晉江人

夙興寒尚峭，雞犬隔江喧。
戴月盤山磴，推雲渡鐵門。
扶繩登冉冉，與鶴共軒軒。
鬼斧君能運，吾尋博望源。

題鐵橋

明崇禎時人 楊繩武

屹立盤江滸，飛梁擊半空。
九臯來瑞鶴，一澗飲長虹。
翻浪

鯨鯢吼奔雲車馬通我非題柱客踪跡感飄蓬

鐵索橋

康熙貴州巡撫田雯德州人

粘天拔地山槎枒下有黝潭龍所家捷獵飛鳥不敢渡莊
踦矐目空咨嗟巧鍛長絙三十六東西穿鼻貫石腹蟬螻
屹立體橫陳直使天塹作平陸

紅酣白糝兩山口唇霧噴吐羣峰首畫家能事李將軍瀾
滄江上如斯否縹緲五城十二樓神仙海嶠崑崙丘拔劍
斷空不知險今朝快御天風遊

見田山薑集

盤江曲

康熙永林華院蒲田甯知州人

古渡千盤水連雲一望城守橋諸將在枕劍聽江聲

盤江橋

朱茂時

疊嶂曾無三尺平盤江狹處鐵橋橫短裙窄袖花蠻女宛
在秋千索上行

盤江橋

程封江夏人

盤江中斷鐵橋開乍見心驚首欲回誰遣鬼工排鳥道直
教天塹走龍媒如雲戍卒防秋去盡地金錢轉餉來聞說
波流通緬甸河源萬里令人哀

鐵索橋

康熙超遠雲南人
詩僧

萬山誰劃斷一水界東西地曠風逾急天低雲易迷半空

橫鐵索千尺跨虹霓我欲橋邊宿江猿休夜啼

見別裁集

盤江橋

康熙按察使彭而述鄧州人

鐵橋黑水舊知名天險曾當百萬兵試問臨筇持節客當年何路入昆明

鐵索橋

乾隆貴州學政鄒一桂無錫人

豈徒騎馬似乘船鐵索橫空欲上天正是扶風吹不定怒濤飛吼起龍眠

十二峯頭鎖玉關八牛植柱屬連環盤江萬里滇黔界一

道長虹控百蠻

盤江橋

乾隆永甯知州劉鴻誥荆州人

兩崖遙束一江流
天半長虹敞不收
鐵索連雲鰲寂寂
朱樓入戶鶴悠悠
磨崖誰鑿崎人字
題柱難消客子愁
笑我秋來無箇事
漫從飛壘騁騑騮

登鐵索橋樓

乾隆南甯知府李其昌成都人

盤江霧湧間
通遊鐵索橫
波穩造舟萬壑
雷轟奔澗底
半天虹飲落
峯頭風清古
岸鞭投色
逆苗昔曾據此
月映征霜板
跡秋喜上高樓
聞牧笛蠻烟
吹過碧光浮
見舊志

過盤江橋

雍正安南知縣曾紀常監利人

嶄崖插晴昊，奔蕩瀉危碣。嵌空揮削成，苔老繡花別。密理發深殷，流霞經飲啜。熊熊水上光，剛柔分以節。停驂清谿隈，順流放舟楫。滉蕩波光迴，形貌恣奇眇。飛龍捲萬里，澎湃聲寒裂。欲問河源槎，探奇從無柰。諸潭險歷多，五湖逸此桀。古木撐墜嵒，蟠柢半天揭。偃仰礙娑婆，艱難處危嶮。香桃花片開爛熳，紅如纈。齒齒復鑿鑿，登頓阻攀掣。君不見江流石隙鎖，山脊鐵繩綴。虹雨拖蜃烟，熙熙補天缺。意喜大造本無心，混沌何巧拙。一自文字闢，山鬼走嗚咽。機

巧日以競興廢直一瞥何如跼跼飛鳴自趨絕

見舊志

鐵索橋

道光貴州學政錢寶琛

盤江山頭高矗天盤江山下藏深淵雙峯擎出巨靈手劃
開地肺迸飛泉懸巖對峙三百尺俯瞰一氣連雲烟陰風
怒號老龍泣白日走匿瘦蛟潛天公一夕運神化驅使丁
甲來山前出鐵之山三千六神工鼓鑄穿其巔太乙下窺
風雨吼豐隆赫怒雷霆邊須臾采虹落天半危梯怪石相
鈎連黔虹二字大如斗烟雲磨滅知何年我來十月山行
險百步九折紆迴旋陡瞻天塹動驚怖及上數級如平川

世路險夷何足論由來王道本蕩平嗚呼王道本蕩平寄
詩為道司牧賢

鐵索橋

道光石黃培杰
知府 紹興人

建策能為天下奇匠心獨運險成夷登橋試望花江水記
否當年公渡時

鐵索橋

道光楊茂先
舉人 永甯人

神工鼓鑄妙經營鐵索橫江砥自平險阻渾忘心亦坦兒
童歌笑聽江聲

鐵索橋

清安南張翰
知縣

盤江江上樹毵毵鐵索橋邊小駐驂
行到半坡高處看萬峯環繞是安南

府志云鐵橋詩尚有明人姜思睿吳兆元前清謝庭薰
吳中蕃胡超林天育諸詩詩皆不佳故不錄

過鐵索橋近作

李大澤

本邑人

盤江江水浪滔滔滾雪翻銀雷怒號對峙青山常碍日橫
牽鐵鍊不勞篙音傳空谷驚心魄鳥蔽晴天倦羽毛磴道
行人多感慨願舒雙翼逐風翔

阿黑河橋 在縣城東二十餘里

通志云阿黑河橋在城東二十餘里

西坡河橋 在縣城西南三十里

通志云西坡河橋在城西南三十里滇黔要津東西兩岸俱有高巖為安南普安兩縣之分界

西甯河橋 在縣城西十里

興義府志云西甯河橋在西甯河上路通阿都驛上滇下黔必由之地

福星橋 在縣城南十五里

按福星橋在縣城南十五里兩山之間澗廣三丈餘入

城必由之路其澗自城西控引畎澮畢聚於是達鳳山
後海子而入洞循洞出會那郎河入江水漲人恒病涉
乾隆二十四年知州錢某建橋高澗皆丈餘宛如康莊
旁有青峯瀑布芳草晴沙幽景如畫

金石

明王廷瑞城隍廟碑 在西門內城隍廟

興義府志云碑在廟內廟為明洪武中建嘉靖二十四
年修王廷瑞撰文勒石廷瑞安南人官大姚知縣

碑文見後

明郭子章玉皇閣鑄像記 在南門外玉皇閣

興義府志云碑在玉皇閣閣為明正德中建萬曆中修
安南薦紳彌勒州知州楊垓鑄玉皇像巡撫郭子章撰
文勒石子章字青螺泰和人碑文後

明梁森玉皇閣石牆記 在南門外玉皇閣

明梁森修玉皇閣路記 在南門外玉皇閣

興義府志云二碑並在玉皇閣森安南人官遂甯知縣
明汪克昌安南學三田記 在學宮內

興義府志云碑在學宮內明安南學有學田祭田科貢
田是為三田萬曆中汪克昌撰記勒石克昌安南人碑文

後附

明尾灑驛碑 在縣城南

興義府志云碑在城南尾灑驛為明洪武中置碑載明時驛制稱設管驛千戶一命普貊營馬乃營必黑營阿計營四營輸供芻牧其碑文安南舊志節引之今碑剝蝕不可讀

明林喬南飲馬池碑 在縣南三里飲馬池上

興義府志云碑在池上明參政林喬南大書四字勒石曰甘泉聖跡至清朝總督蔡毓榮又書四字勒石曰且

以飲人其側又有巡撫黃國材撰文紀事一碑

明宋方麓鴉關碑 在縣南三里鴉關

興義府志云碑在鴉關飲馬池側明萬曆中蜀人宋方麓書四大字曰雲陵山色鐫于道旁之山麓石上碑側又有一碑為江夏程封書四大字曰鳥道千重亦鐫于山麓石上

明鄧子龍欲飛石題字 在文廟後

舊志云石在城內文廟後廣數丈明總兵鄧子龍書欲飛二字鐫石畫寬尺許

明小蘭亭碑 在縣東一百五十里水橋今已撤隸貞豐

興義府志云碑在亭側紀亭幽勝亭為明萬曆中永甯州知州陳聖佐建

明沈翹楚鐵索橋碑 在縣東盤江鐵索橋

興義府志云碑在橋側橋為明崇禎中參政朱家民建沈翹楚撰記勒石其後修橋清朝經略洪承疇總督趙廷臣巡撫卞三元皆有碑碑文互見建置志鐵索橋條

明閃繼迪建十一城碑 在縣東

興義府志云碑在縣東十一城為明崇禎中參政朱家

三南縣志
民建閃繼迪為文勒石

天塹驚虹碑在縣東盤江鐵索橋側

興義府志云碑在盤江鐵索橋之西鐫四大字曰天塹
驚虹旁鐫聯云峻嶺不飛天外雁驚濤常起地中雷

雲裏金鰲碑 在縣東盤江鐵索橋側

興義府志云碑在盤江鐵索橋之西鐫四大字曰雲裏
金鰲

按鐘鼎之屬安南當極盛之時已云甚少如南峯寺之
古銅鐘二一失於道光初年一遭咸同之亂毀於賊玉

枕山之古銅小鼎亦於民國元年為寺僧竊燬今惟巍
山廟之石鼎猶存至碑記尚多存在僅將興義府志所
載者按次註出並將原文抄錄于後

附文

修城隍廟碑

明嘉靖大姚知縣王廷瑞本邑人

嘉靖二十四年歲在乙巳正月初三日重修城隍廟至
丙午歲三月落成予嘗泛觀理之在天地間一誠而已
我太祖高皇帝龍飛淮甸迅掃元凶平定天下於明而
人也則設官分職以理之有司則有守令之職軍衛則

有使司之事上而至於臺省公卿莫不皆然雖曰官有
尊卑而治民之責則同也於幽而鬼神也則設為城隍
以主之府衛有府衛城隍州縣有州縣城隍上而至於
京都邦國莫不皆爾雖曰位有大小而屬祭之主無異
也在陽之官既有公所以為宣化之地則城隍為陰之
正神安可無殿宇乎我安南創自洪武之初城隍廟建
於西隅之要地制度非不宏偉也規模非不壯麗也但
歲久頽敝增修者一椽一柱而已百七十餘年未有立
意鼎建者焉衛之掌印指揮使陶公巡捕指揮使曾有

大管操指揮梁允昌管屯指揮使李鎮吳南勳捐營修
爰暨城西官舍會首劉賓王言南峯寺長老法會等悉
皆誠意交孚合衛士庶咸出金助以成其事復得掌篆
指揮使王爵攄誠協慮互相贊助以畢其功凡軍民百
姓工人匠氏樂於赴工而大相會和經之營之由合而
完由完而美未一載間而堂殿奐輪孰非神人協應一
誠之交感也哉岑堂朴素非飾雕梁畫棟之美也大廈
渾堅不為山節藻稅之華也赫赫然可為一方之巨瞻
浩浩然可為萬民之仰戴自是神得以安屬得以主人

安南縣志
得以甯鬼得以理藩鎮之化得以浹洽官府之政得以
清明軍民之奸得以懾服作善得以降祥作不善得以
降殃風雨以時寒暑以候陽不失其為陽陰不失其為
陰豈小補哉是為記

玉皇閣鑄像記

明貴州
巡撫 郭子章

予嘗往來行役至安南之境出城南門外望見一山巋
然特起樹林參差秀聳可愛誠一奇觀也訊之輿卒皆
曰此南峯寺之後山也寺在山前為習儀之所山頂舊
有毘盧閣歲久傾圮而遺址尚存今已鞠為茂草矣萬

曆初居人陸道清梁世芳穆世恩及寺僧戒通等共發
菩提心集金鳩工建閣三重上以奉玉皇中下二層以
奉三官靈官今成鑄像惟玉皇金像工費不貲竟未能
造近鄉官雲南彌勒州守泰字楊君垓以母王太宜人
命造玉皇金像一尊捐金造成送閣又捐金置供鑪諸
物及佛殿城隍廟大鑪又鑄南觀之觀音真武文昌三
教聖像並鑪瓶諸物購觀田又鑄湧泉庵之圓覺聖像
並置鑪瓶購庵田此皆功德之在安南者不可不紀使
人感發而興起永垂於不沒雖然有大於此者楊君之

捐貲修置所以祝聖壽於無疆敬君之忱也非忠乎順
親心於無斃養母之志也非孝乎一舉而忠孝咸備子
臣之道孰大於是視世之流連光景假修建為遊觀計
者大不侔矣予辱楊君愛最深且久與君莫逆屢欲為
君綴一言以君固辭而止茲因耆民寺僧之請也漫書
此付之不識楊君以為何如

玉皇閣石牆記

明遂甯梁森
知縣人本邑

事固貴於謀始而尤貴於圖終終之不慮並其始之謀
者胥失焉南峯寺後山修玉皇閣功垂成而工食缺乏

衆皆束手莫知所措求助於朱參軍羅撫軍猶不足羣
聚而商適有優人寓此乃曰吾儕蓋於寺中作佛劇以
勸諸人凡老稚之聚觀者歛其錙銖裒多益寡或金集
而閣成咸曰可凡作劇七日而得金足始克有濟工畢
時鄉宦楊君任雲南彌勒州守聞閣成鑄造帝像至共
議奉安值烈風雷雨山峻閣高震撼欹斜僉謂奉聖像
於上重愈難勝屹立之久未可卜惟築中牆斯可久乃
復捐金召匠鑿石周圍堅築自閣甚至級丈有七尺堅
緻縝密觀者咸喜曰是可以歷久遠矣衆請予願為文

安南縣志
以記予以修閣有記矣茲復有言不幾賢乎衆曰記修閣舉其綱記叙之始也記修牆詳其目記善諸終者也何以重複嫌哉因備述而書之於右

修玉皇閣路記

梁 森

精於創修者識緩急之宜善助功成者知先後之序非淺陋吝嗇苟且目前之謂也萬曆元年正月謀建玉皇閣於南峯寺之後山山巔雖有舊徑然地勢高峻歷年既久路崩險仄上下維艱衛人陳大經乃語諸族人曰與其同衆建閣孰若專於修路先其難而利便之可也

乃捐貲與其弟姪若孫共二十三人召匠鳩工伐石崖
高者鑿去之低陷者填補之自山麓至建閣處凡九曲
徑三十五丈都計九十九磴梯級以次量度陡甚者曲
而緩之必穩必堅於是上下始便有事於斯閣之役者
免蹶足却步之虞而勞苦差減矣工始於七月朔畢於
十月初十費白金五十五兩予方撰築牆記甫就或復
索予為修路記予以一閣三記傷於煩未之許有諗予
者曰建閣之功固皆宜獎錄鐫示後來山路之修先所
難而利諸後又善功之最者當大書特書之可也予深

題之陳氏是舉誠哉識緩急之宜達先後之序深長悠
遠謀慮允臧其有功於斯閣非淺矣故不厭其履而詳
之是為記

安南三田記

明汪克昌本邑人

貴州僻在西南而安南尤最爾國家右文造士之化雖
不間於遐荒顧邑地瘠薄賓興諸典率多闕略士挾策
應試者涉盤江陟關嶺巖菁榛莽蠻烟瘴雨之中窮途
可惻州牧陳公稅兢作人勸學聞諸生一逢考核輒患
行糧請以安南衛人梁汝師梁應岳所捐五蘇田租十

石李時芳李崇儒所捐水松田租十石共租二十石遇
科舉年均給科舉諸生遇應貢年均給應貢諸生三年
衛當貢其間則大比也費不在官而士之邀恩者溥於
是弟子員七十人邀予作記紀乎貞珉予謂學校本明
道之區而求田則謀食之計經術為崇實之學而科貢
則近名之圖然非名無以徵實非食無以資道夫相壤
· 遵播修溉芟惡蓋終歲勤勤乃可以期納稼贍饑餒六
經孔孟學庸之書旁及子史百家士子良田其在此乎
心惺惺其種也誠敦倫勵行以植其根窮研博覽以達

其枝親賢友善而灌溉洗心滌慮而耨耘則志業不荒
華實並茂由科貢而奮跡泥蟠又將抒抱負為經濟何
嫌乎名何愧乎實哉是州守勸駕之意也其或與食於
田者漫無期待不與食於田者計生覬覦規就升斗較
量多寡抑幸而膺歲薦登科第寸效罔施志在溫飽猶
夫舍己芸人未免不秀不實之譏竊惟實之不存名將
焉附食功食志將何以自解耶昔伐檀之詩曰不稼不
穡胡取禾三百廛兮彼君子兮不素餐兮余重為多士
望已先是金宿淵捐祭田一區租三十石授之余廣文

而廣文首循不充恣取殆盡祀期近輒乞豪家具脯棗
萬曆戊寅司訓徐君者出其粟糶之得白金六兩分辦
二祭永著為例並勤於石因為三田記期永守於方來
鐫石甫竣會鄉耆周以讓父遑獻保甸田租十二石送
學書食弗受價州衛包君吳君深嘉其意續附碑右後
之君子食其田者幸無負此雅意也州守陳公聖佐富
縣人徐公宗傳名山縣人按碑中所言州守陳公聖佐
乃永甯州知州明時永甯州

知州移
駐安南

修飲馬池記

康熙貴州
州巡撫黃國材奉天
人

康熙戊戌夏余奉命會蔣大司馬議廠政於滇黔之

界自普安抵安順越二百餘里皆崇山峻嶺路轉盤螺

非屢息不能陟其巔往來行人時值炎蒸烈日曝炙胥

苦煩渴望山泉若甘露焉聖天子治化深洪普天之

下莫不飲和食德真無一夫之不得其所覩茲道渴之

衆是又撫民者所當因時制宜亟思所以利濟于其間

者也由是與張軍門各捐金命牧令遇險道乏泉者建

茶亭以拯煩渴安南之南舊有茶亭在湧泉寺外寺內

奉漢壽亭侯像下有飲馬池前賢撰有碑記題曰甘泉

方今盛夏水長而池涸無涓滴潤余甚訝之詢寺僧言
昔侯南征道過斯人馬渴乏忽見湧泉以濟人引水以
濟馬一時人馬渴解流傳至今世遠年湮池水漸涸余
聞乃更捐金建立茶亭重浚飲馬池鳩工命匠尋至山
巔得湧泉之源鑿石為筧引水入池溯洄澄澈四時不
息行見人馬利賴成一時不刊之舉源泉井竭垂萬世
不替之規庶幾于稚化難徧者未必無小補云

重修漢壽亭侯廟碑

康熙安南
衛守備

程

璧

休甯
人

安南居黔屬上游蠻烟霞翳漢苗雜處之區也古所謂

巖疆者非歟余以庚子歲承乏茲土值兵燹之餘蒿萊

滿目青燐夜聚元猿晝啼失所哀鴻盡瘁招徠於是漸

獲甯宇城南舊有關侯祠丹堊彫剝堦墀蔓草幾不能

展籩豆矣余進土人而語之曰是必守祠者無資致此

苟能留心區畫豈荒落如此爰設會每年孟春二日舉

行閭巷編氓聽其樂輸行之數載積有多資余董其事

率同寅諸公各捐金以相厥不逮遂購廟田嗣是彫剝

者暨茨丹腹廟貌威嚴儀容儼雅億萬斯年香火弗替

余竭對越之忱以告成事抑予更有說焉方今侯之靈

夷覃敷尸祝徧天下風馬雲車排闥闔遨遊八極詎謂
南方一片土能邀信宿於此乎昔伏波將軍馬援佐白
水真人為東漢名將南宋有立祠奉祀者人怪之曰將
軍足跡所未經神所憑依將不在是矣以祠為紫陽翁
云是殆不然神之格思不可意計將軍忠義振往起來
即立祠亦胡不可然今廟田之設既以安神亦欲賴侯
之忠義餘風潛移默牖俾此疆漢夷革心向化紓天子
南顧之憂則是舉也有裨於軍國有造於生民其為地
方計豈淺鮮哉

重修玉皇閣記

謝芳遠本邑人

安南處高山大陵之間舊有利觀叢林今所謂玉皇閣者蓋古刹中之一也閣在南峯古寺之上有苔堯偉特之觀賢人君子每一登臨俯視而見山下之人烟迤邐市井紛紜未嘗不流連致嘆於其間也余以乙丑冬月登之而寄目而其山之僧通明為余言曰此刹成敗幾經矣丁亥兵火頻仍已毀過半至丁未幸黃氏子宏聖修葺完固如初其後又罹兵火樓閣棟楹之橈折者瓦磚之損敗者不可勝數僧意謂如此剝落而不修其如

前人之志何於是本衛宰官及諸君子施金共成厥工
且昔以山高路險上下負薪汲水如經九折今於山後
鑿石新開一徑直抵源泉自茲薪水之需較前多便其
有德於此利誠重矣幸子為我記之余曰此利興廢疑
有數存乎其間不然奚南峯諸刹皆不獲保其無恙而
此獨能久存乎其理似不偶然雖然信之堅則萬物備
敬之至則百神享嗚呼斯刹之所以久存而不壞者其
是之謂歟其是之謂歟

安南縣志稿卷二

學校志 學宮 學制學額 書院 義學 學堂

學宮

康熙八年安南衛守備戴威遠教授周廷尚捐建後燬由
綏遠將軍蔡毓榮捐修二十六年改衛設縣首任知縣張
文旂訓導鄒希賢增修三十二年知縣金光全重修雍正
五年知縣李升元教諭劉鎧七年署知縣曾紀常九年署
知縣何天衢十年知縣陳以明先後增修道光五年邑人
又捐金重修

學制學額

教諭一員

訓導一員

歲試學額 文武生各八人

科試學額 文生八人

廩生 二十人

增生 二十人

歲貢生 二歲一人

書院

安南先無書院道光十五年知縣李振堃撥鳳凰山寺租二百六十八石有奇備建書院十六年知縣張士英又撥五里碑地租八石銀四十兩建蓮城書院於明倫堂之前旋圮二十一年知縣婁鎔捐銀百兩益以邑人捐銀五千九百七十兩遂復建於學宮之右又購田歲租都計一百三十八石有奇又撥銀一千二百兩解府修試院其捐輸姓名皆刊於石

義學

康熙二十九年知縣張文旂首建義學於泮池上三十八

年典史署火典史王毓奇易基改建既而新建典史署及
義學皆火復建於原基後圯十四年知縣王珍改建名
曰同仁義學又購地城南別建一義學嘉慶初知縣魏均
新設義學三皆廢道光十八年知縣尹思敬又設南北二
義學借廟設學撥黑旂河延寨租穀六十三石為脩脯後
皆燬於兵燹

學堂

光緒三十一年知縣白嘉澍於江西會館創設初等小學
堂三十二年移設蓮城書院定名蓮城學堂三十四年分

學生為高初兩等宣統元年分高初兩等學生為四班以
甲乙丙丁為班次均定四年畢業改名官立兩等小學堂
至三年學生增至二百四十餘人有教職員十人辛亥八
月甲班學生畢業民國成立後仍繼續辦理學堂經費初
以書院膏火穀及學租開支不敷之數由縣籌補宣統三
年裁撤學官乃移學米二十八京石添補並提各市屠捐
斗息為教職員伙食及堂丁薪資

...

...

...

...

...

...

...

